

Ils problems ordinaris da Ludmilla Cahenzli

(cp) En la nova publicaziun da la Surselva Romontscha «Da la vita da Ludmilla Cahenzli» raquinta la protagonista Ludmilla da problems dal mintgadi dad ina mamma moderna che lavura. Als Dis da litteratura a Domat ha lieu la vernissascha dal cudesch la sonda, ils 3 da november. Ludmilla Cahenzli en persuna sa preschenta als Dis da litteratura: la sonda, ils 3 da november a las 11.25 uras cumpara la figura principala dal cudesch «Da la vita da Ludmilla Cahenzli» en la sala Tircal a Domat per preschentar sias columnas al public. Igl è ina vernissascha speziala, pertge betg l'autura sezza preschenta l'ovra, mabain la protagonista, giugada da l'actura Justina Derungs. L'unìun da la Surselva Romontscha ha rimnà e publità las columnas davart Ludmilla Cahenzli ch'èn cumparidas dapi il 2003 sporadicamain en La Quotidiana. Las illustraziuns en il cudesch èn dad Yvonne Gienal. A la vernissascha a Domat vegn Ludmilla Cahenzli accumpagnada dal musicist Curdin Janett.

Quella figura Ludmilla Cahenzli n'ha betg adina simpel da manischar sia vita tranter lavur da schurnalista, mamma da trais uffants, plugs en famiglia, chautschas da sport per l'um memia gross, la tema dad ir tar il dentist, la lingua inacceptabla dals uffants e far turtas per las sairas da geniturs (ina mamma cun trais



uffants fa en media 54 turtas durant la scola primara da quels). A moda scharmanta e divertenta commentescha la dunna emancipada ses cumbats cun il mintgadi e co ch'ella chatta cun agid da tschigulatta e ferm café adina ina soluziun. Sa chapescha che era tematicas actualas vegnan tractadas, sco p.ex. il WEF a Tavau, il scamond da minarets, la crisa economica u temas dal mintgadi en ina famiglia normala.

Ils 22avels Dis da litteratura, dals 2 als 4 da november 2012 en la sala Tircal a Domat. Infurmaziuns sin www.litteraturarumantscha.ch.